

27 MAY 2001

Sidang kemuncak

SIDANG KEMUNCAK G-15 BERTUKAR PANDANGAN MENGENAI EKONOMI GLOBAL BARU

KUALA LUMPUR, 27 Mei (Bernama) -- Sidang Kemuncak Kumpulan 15 Negara Membangun (G-15) di Jakarta minggu depan akan menyaksikan negara anggota bertukar-tukar pandangan mengenai Ekonomi Global Baru termasuk cabaran menggunakan potensi era digital bagi pembangunan.

Menurut kenyataan Kementerian Luar di sini, Sidang Kemuncak ke-11 itu juga akan menyaksikan kemasukan dua anggota baru ke dalam Kumpulan itu, Colombia dan Iran.

Kenyataan itu menyebut kemasukan dua anggota baru itu menyaksikan bilangan anggota Kumpulan 15 Negara Membangun meningkat kepada 19 negara.

Pada masa ini, negara anggota Kumpulan 15 Negara Membangun ialah Algeria, Brazil, Chile, Argentina, Mesir, India, Indonesia, Jamaica, Kenya, Mexico, Nigeria, Peru, Senegal, Sri Lanka, Venezuela, Zimbabwe dan Malaysia.

Perdana Menteri Datuk Seri Dr Mahathir Mohamad akan mengetuai delegasi Malaysia termasuk Menteri Luar Datuk Seri Syed Hamid Albar ke sidang kemuncak itu yang dijadualkan pada 30 dan 31 Mei.

Yang turut menyertai delegasi ialah Timbalan Menteri Perdagangan Antarabangsa dan Industri Datuk Kerk Choo Ting dan para pegawai dari agensi kerajaan serta sektor swasta.

Kenyataan itu menyebut bahawa sempena Sidang kemuncak itu, pameran perdagangan Kumpulan 15 Negara membangun akan diadakan dengan 10 syarikat Malaysia dijangka mengambil bahagian.

Menurut kenyataan itu, Sidang Kemuncak dijangka mengeluarkan Pernyataan Bersama dan menerima Deklarasi Jakarta mengenai Teknologi Maklumat dan Komunikasi bagi pembangunan.

Ini selaras dengan tumpuan Sidang tahun ini bagi menggunakan potensi era digital bagi pembangunan, menurut kenyataan berkenaan.

-- BERNAMA

MHI NZ FAZ